

یوہ آکا شوانی جموں ہے محمد آصف لو دھی تے محبوب سلطانی تیں خبر سُنو۔ پہلاں خاص خاص خبر۔

*1- وزیر اعظم نریندر مودی نے کہیو ہے جے دُنیا غی کو ئی وی طاقت دفعہ 370 نانہہ دوبا رہ بحال نہیں کر سکتی۔

*2- اج بی جے پی گامبران قانون ساز اسمبلی نانہہ ہنگامہ آرائی توں بعد اسمبلی توں مارشل غے ذریعے باہر کڈ غے غے اسمبلی نانہہ ملتوی کر دتو گیو ہے۔

*3- جموں کشمیر غا بارہمولہ ضلع مانہہ حفاظتی دستاں تے دہشت گرداں بشکار ٹاکرا مانہہ 2 دہشت گرداں ان نانہہ مار مکایو گیو ہے۔

*4- تے صدر جمہوریہ روپدی مرمو نے دعو کیو ہے جے سرکار غی بد عنوانی غے خلاف نہ برداشت پالیسی رشوت نانہہ جڑ توں ختم کر دے گی۔

خبراں غی تفصیل نال پہلاں محمد آصف لو دھی۔

PM Article 370

وزیر اعظم نریندر مودی نے کانگریس جماعت غی سربراہی مانہہ انڈیا بلاک ور الزام لایو ہے جے واہ جموں کشمیر توں بھارتی آئین نانہہ ہٹانو چاوے۔ انہاں نے کہیو ہے دُنیا غی کو ئی وی طاقت ہُن 370 نانہہ بحال نہیں کر سکتی۔ جناب مودی نے کہیو ہے کانگریس جماعت ہر اک برادری نانہہ اک دوجا غے آمنے سامنے لا رہی ہے۔ لوکاں نانہہ صلاح دتی ہے جے وے اک جُٹ رہیں۔ اُن گو کہنو تھو جے ”اک ہیں تے محفوظ ہیں“، مہاراشٹر مانہہ نومبر 20 نانہہ اسمبلی انتخابات غے چلتیں اپنی پہلی ریلی سنگ خطاب کرتاں واں جناب مودی نے کہیو ہے کانگریس تے اس غا ساتھی علیحدگی پسنداں غی زبان بول رہیا ہیں۔ نال نال انہاں نے کہیو ہے انہاں نانہہ پاکستانی ایجنڈا نانہہ حوصلو نہیں دینو چاہیے۔ جناب مودی نے کہیو ہے کانگریس تے اس ساتھیوں غو ایجنڈو تد تک کامیاب نہیں ہو سکتو جد تک انہاں ور لوکاں غی مہربانی ہے۔ جناب مودی نے کہیو ہے کانگریس ذات غی بنیاد ور لوکاں نانہہ تقسیم کرن غی خطرناک کھیڈ کھیڈ رہی ہے تے اگر درجہ فہرست ذات تے درجہ فہرست قبائل تے دوجا پسماندہ طبقاں مانہہ آن آلی ذات اگر اک جُٹ ویں گی تان کانگریس غی سیاست غو صفا ہو جائے گو۔

Mock Assembly

قانون ساز اسمبلی مانہہ اج تیجے تہاڑے وی نعرے بازی نے شور شرابو جاری رہیو۔ جت حزب اختلاف غا ممبران اسمبلی جموں کشمیر غو خصوصی درجو بحال کیا جان غی خاطر ایوان مانہہ پاس کی گئی قرار داد غے خلاف بول رہیا تھا۔ جیساں ہی ایوان غی کاروائی شروع ہوئی تاں بی جے پی غی طرفوں شور شرابہ غا سلسلہ مانہہ اسمبلی غا سپیکر عبدالرحیم راتھر نے مارشل نانہہ ہدایت کیں جے ایوان غی کاروائی مانہہ خلل پیدا کرن آلاں

نانہ باہر کڈیو جا ئے جس تیں بعد ما رشل نے لنگیٹ اسمبلی حلقہ غا ممبر شیخ خُرشید سمیت 12 دوجا حذب اختلاف غا لیڈراں نانہ ایوان تیں باہر کڈیو۔ اس طرح نعرے بازی کرتاں واں بی جے پی غا 11 دوجا ممبراں نے ایوان تیں واک آؤٹ کر دتو۔ واضع رہ جے گذشتہ بدھواریں جموں کشمیر اسمبلی مانہ نائب وزیر اعلیٰ سُریندر کمار چودھری نے خصوصی درجہ غی بحالی غی خاطر اک قرارداد پیش کی تھی جس مانہ مرکزی حکومت تیں مانگ کی گئی ہے جے مرکزی حکومت جموں کشمیر غا چُنیا گیا عوامی نمائندان نال گل بات شروع کر غے خصوصی درجہ نانہ بحال کرے۔ ور حذب اختلاف غی جماعت بی جے پی اس قرارداد غے خلاف لگاتار نعرے بازی کر رہی ہے۔

Assembly BJP

جموں کشمیر قانون ساز اسمبلی مانہ ایوان غی کا روائی شروع ہوتاں ہی حذب اختلاف غی طرفوں نعرے بازی کیا جان غا سلسلہ مانہ آج مارشل غی طرفوں بی جے پی غا ممبران نانہ باہر کیا جان تیں بعد اُن نے اسمبلی حال غے باہر اک نمیکلو اجلاس منعقد کیو۔ اس اجلاس غے دوران اُن نے حالیہ تہاڑیں جموں کشمیر غو خصوصی درجو بحال کرن غی خاطر پاس کی گئی قرارداد نانہ غیر آئینی تے غیر جمہوری قرار دتو ہے۔ اس معاملہ مانہ بی جے پی لیڈراں نے کہیو جے نمیکلو اجلاس منعقد کران غو مقصد نیشنل کانفرنس غے خلاف نعرے بازی کرنو ہے۔

BJP Udhampur

بی جے پی غی اُدھم پور یونٹ تے دوجی سیاسی تنظیمان نے گذشتہ بدھواریں نیشنل کانفرنس جماعت غی حکومت غی طرفوں ایوان مانہ جموں کشمیر غا خصوصی درجہ غی بحال بارے ایکن قرار داد نانہ پاس کرن غے خلاف احتجاج کیو ہے۔ احتجاج کاران نے گئی رات کشتواڑ ضلع مانہ گرائیں دفاعی کمیٹی غا ممبراں غی ہلاکت ور سوال چاتاں واں وزیر اعلیٰ عمر عبداللہ ہائے ہائے تے پاکستان مُردہ باد غا نعرہ لایا ہیں۔ واضع رہ جے احتجاج کاران نے گول مارکیٹ اُدھم پور مانہ جموں کشمیر حکومت تے پاکستان غو پُتلو ساڑیو ہے۔ بی جے پی کا رکنان تے لیڈراں نے مانگ کی ہے جے جموں کشمیر مانہ دہشت گردی نانہ بابدو دین غا معاملہ مانہ پاکستان غے خلاف کا روائی کی جانے چاہیے۔ اس سلسلہ مانہ اُدھم پور ضلع واسطے بی جے پی گا ضلع صدر آرون گپتا نے اس طرح کہیو۔ بائٹ۔

Sopore Terrist Killed

شمالی کشمیر غا ضلع با رہمولہ مانہ حفاظتی دستاں تے دہشت گردان بشکار ٹاکرا مانہ 2 دہشت گردان نانہ مار مکایو گئیو ہے۔ اس ضمن مانہ کشمیر زون غا پولیس ترجمان نے دسیو ہے جے پچھلی شام حفاظتی دستاں نے پانی پور رہ سوپور مانہ دہشت گردان بارے ملی سوتوں بعد اک دہشت گرد مخالف کا روائی شروع کی تھی۔ تاہم اس کا روائی غے دوران اُت چھپیا واہ دہشت گردان نے حفاظتی دستاں ور گولی بازی شروع کر دتی۔ جس غانتیجہ مانہ یوہ ٹاکرو شروع ہو گئیو۔ ٹاکرا آلی جگہ توں خاصی مقدار مانہ گولی سکوی برآمد کیو گئیو ہے۔ تاہم آپریشن اجاں وی جاری ہے۔ تے مزید تفصیلات غی اُڑیک ہے۔

Kishtwar PSA

کشتواڑ ضلع مانہ امن و قانون غے ذریعے لوکاں غی حفاظت نانہ یقینی بنان غی خاطر ضلع مجسٹریٹ کشتواڑ راجیش کمار شون نے 5 ملزمان غے خلاف عوامی حفاظت بارے قانون پی ایس اے غے تحت کا روائی کرن غو حکم دتو ہے۔ اس سلسلہ مانہ آکاشوانی جموں غا مہارا نمائندہ نے دسیو ہے جے پی ایس اے غے تحت سیگڈی بھاٹہ غا بسنیک محمد عبداللہ گجر، کیکر واگان گا بسنیک نور دین ترونکی دچھن غا غلام نبی چوپان ناٹاس غا محمد ظفر شیخ تے دھنگدوڑ دچھن غا بسنیک محمد رمضان ور پی ایس اے عائد کیو ہے۔ تے الزام ہے جے ان ملزمان نے متی ساری ملک مخالف سرگرمی انجام دتی ہیں۔ دسیو گیو ہے کہ اس سلسلہ مانہ ان غی گرفتاری بارے ضلع مجسٹریٹ نے متعلقہ ضلع غا ایس ایس پی نانہ گرفتاری وارنٹ سونپیا ہیں تانجے مزید کا روائی نانہ اگے بدھایو جا سکے۔ اس سلسلہ مانہ ضلع مجسٹریٹ غو کہنو ہے جے اس قسم غا گنڈاں نانہ کا ئے وی رعایت نہیں برتی جائے گی۔ جہڑا امن و قانون مانہ خلل پیدا کریں۔

EAM

خارجی معاملن غی وزارت نے سماجی میڈیا ور گردش کر رہی اُس رپورٹ نانہ پوری طرح خارج کر دتو ہے جس مانہ کہیو گیو ہے جے مغربی بھارت سفارت خانہ نانہ دہشت گردان نانہ تربیت دین غی خاطر استعمال کیو جا رہیو ہے۔ سماجی میڈیا ور گردش کرن آلی اس رپورٹ مانہ الزام لایو گیو تھو جے بھارتی حکومت سفارت خانہ نانہ انتہا پسندی غو مقابلو کرن واسطے اک بڑی طاقت غا طور ور تیار کرن بارے استعمال کر رہی ہے۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال محبوب سلطانی۔

Prez Corruption

صدر جمہوریہ دروپدی مرمو نے اج کہیو ہے جے رشوت اک بیماری ہے تے اس نانہ جڑ توں ختم کر دتو جا نو چاہیے۔ اُنہاں نے اُنہاں گلاں غو اظہار اج نوی دہلی مانہ مرکزی ویجی لنس کمیشن غی طرفوں ویجی لینس بیداری ہفتہ 2024 بارے اک تقریب مانہ خطاب غے دوران کیو۔ صدر جمہوریہ غو کہنو تھو جے لوکاں غا کھاتاں مانہ برائے راست رقومات غی فراہمی ای ما رکیٹ پلیس تے اقتصادی مجرم غا قانون سنگ گجھ حد تک اس نانہ روکیو گیو ہے۔ اُنہاں نے کہیو جے اس ہفتہ نانہ سردار ولہ بھائی پٹیل غا جتم تہاڑا ور منعقد کیو جائے۔ اُن غو مزید کہنو تھو جے بھروسو کسے وی سماج غی نیو اور رشوت سماج مانہ بھروسہ نانہ کھٹ کر رہی ہے۔

SC AMU Verdict

عدالت عظمیٰ غا 7 ججاں ور مشتمل اک عدالتی بنچ نے اج 3 گا مقابلہ مانہ 4 غی اکثریت نال ایس عزیز باشا با مقابلہ یونین آف انڈیا غا ایکن مقدمہ مانہ 1967 غا اُس فیصلہ نانہ خارج کر دتو ہے جہڑو علی گڑھ مسلم یونیورسٹی نانہ اقلیتی درجو دین توں انکار غی بنیا دبنے۔ واضع رہے جے اس معاملہ بارے 1967 گا ایکن فیصلہ مانہ کیو گیو تھو جے آئین غے تحت شامل ادارو اقلیتی ادارو ہون غو دعوو نہیں کر سکتو۔ اس سلسلہ مانہ عدالت عظمیٰ نے اج کہیو ہے جے کوئی وی ادارو آئینی حیثیت نانہ چھڑو اس واسطے نہیں گما سکتو جے اس نانہ اک قانون غے ذریعے بنایو گیو ہے۔ اس سلسلہ مانہ اکثریت غو کہنو ہے

جے عدالت نے اس معاملہ مانہہ جائزو لینو چاہیے جے یونیورسٹی غو قیام کس نے عمل مانہہ آئیو تھو۔ تے جے کدیں تحقیقات اقلیتی برادری در اشارو کرے تاں ادارو آئین غا آرٹیکل 30 غے تحت اقلیتی حثیت گو دعوو کر سکے۔ واضع رہ جے آئینی بنچ نے اس معاملہ مانہہ اک باقاعدہ عدالتی بنچ غے حوالے کر دتو ہے۔ جس غی سربراہی عدالت عظمیٰ غا چیف جسٹس ڈی وائی چندر چڈ کر رہیا ہیں۔ جن غو کہنو ہے جے اس معاملہ مانہہ بکھ بکھ رائے باندے آئی ہیں۔ جن مانہہ 3 اختلافی فیصلہ وی شامل ہیں۔ واضع رہ جے اس معاملہ مانہہ جسٹس سوربہ کا نت، دپانکر دتہ تے ستیش چندر شرما نے اپنا بکھ بکھ فیصلہ لکھیا ہیں۔

Railway Special Train

بھارتی ریلوے نے چھٹھ پوجا غا اختتام تیں بعد ہون آلی بھیڑ نانہہ کھٹ کرن نالے مسافراں نانہہ سوکھت پجان غی خاطر 500 خصوصی ریل گڈیں چلان غو فیصلو ليو ہے۔ واضع رہ جے اضافی ریل گڈیں سمستی پور، دھنہ پور تے دوجا ریل رستاں ور مقامی مسافراں غی مانگاں غے مطابق چلائی جائیں گی۔ اس سلسلہ مانہہ ریل بارے متعلقہ اتھارٹی نے جانکاری دتی ہے جے 160 خصوصی ریل گڈیں پلک، 161 گڈیں 10 نومبر جد کہ 155 ریل گڈیں 11 نومبر نانہہ چلائی جائیں گی۔ واضع رہ جے مسافراں نانہہ سوکھت پجان غا سلسلہ مانہہ بھارتیہ ریل اتھارٹی نے یوہ فیصلو ليو ہے جے 1 توں 30 نومبر توڑیگل 7 ہزار 7 سو 24 نوی ریل گڈیں چلائی جائیں گی۔ تانجے تہواراں غے دوران مسافراں غا سفر مانہہ سوکھت پیدا ہو سکیں۔ واضع رہ جے یاہ تعداد گذشتہ سال غا مقابلہ مانہہ 73 فیصد متی ہے۔

Mangotra

منگوترا برادری گو سالانہ اجتماع 14 نومبر نانہہ جموں مانہہ دیوان ستھان پوجا ہوا رانی چوادی مانہہ منعقد وے گو۔ اس سلسلہ مانہہ جشن پوجا تے ہون سویرے شروع وے گو تے اس غے بعد 8 بجے بھنڈارو وے گو۔ اس ضمن مانہہ منگوترا برادری سمیتی جموں غا صدر امبریش منگوترا نے منگوترا برادری، ان غا رشتہ داراں توں گذارش کی ہے جے وے اجتماعی دن ور پوجا رانی نانہہ خراج عقیدت پیش کریں تے انسانیت غی امن تے خوشحالی واسطے ان غی نیک خواہشات حاصل کریں۔

اس غے نال ہی خبراں غو یوہ بلیٹن ختم ہوؤ۔